

## UNTER DEM LAMBERTITURM

**K**innersnee, dat harr di ok scheev gahn kunnt! Körtens bün ik dör mien oll Kuntrei fahren. Dorbi hebb ik faststellt, dat de Tankstee bi de Möhlen minner Geld för Sprit hebben will, as de Tanksteden dor, wor ik nu wahren doo. Hebb mi denn docht, wenn ik mien Familie of mien Fründins visiten will, kann ik dor doch eevkes tanken. Butendeem kunn ik in de Blömenladen, haast tegenover, glieks wat Bleiheree besörge. An een Saterdag sull dat gahn. Man dat harrn sük woll ok anner Minsken utdocht. Bi de Sprit weern mi dat to völ Autofahrers, de tanken wullen. Denn man doch glieks na de Blömen to. Van dat up anner Sied is völ Bott. Dor wull ik hen un sett de Blinker. In de Moment seeg ik, dat vör de Blömenladen nu ok een groten Parkplatz is. Dor kunn ik ja völ beter stahn un glieks de Blömen inladen. Gedocht, gedaan, Blinker anners sett und Lenker inslaan. Dor kreeg ik halv achter mi een Bulli in 't Vermick. De wull mi nett överhalen. De Fahrer huup als mall, ik brems, dat mien Foot haast dör dat Blick stö-



ten dee. Puuh, noch mal nett good gahn. Ik hebb noch mien Hand uptillt. Entschülligung, deit mi spieten, wull ik dormit seggen. Hett he dat woll noch sehn? Hebb mien Auto denn doch up de groot Parkplatz ofstellt. De beid Kisten mit de feine Steevmoderkes hett mi de Görner röver brocht un in dat Auto sett. Dorbi hebben wi mit eenanner prootjet, as weer ik heel nich so lang weg west. Nett in disse Tied, wor een wegen Corona haast mit nüms umgahn un proten kann, hett mi dat düchdig good daan. Sprit hebb ik woll an de Saterdag nich kregen, man dreemal Dank seggt an disse Dag: För de Blömenproot. Dorför dat dat keen Rums geven hett un Dank an de Schutzengel, de dorför sörgt hett, dat all goodgahn is. **Elke Bontjer-Dobertin**